

Parlament da las mattas inoltescha duas petiziuns

■ (anr/fa) 19 pertschient dals commembers dal cussegl grond grischun èn dunnas. Forsa ch'inqualina da las 101 mattas che han debattà ier a Cuira sa decidan pli tard da far politica e dad auzar uschia quella procentuala. Ils 12 da november è stà il Di naziunal da l'avegnir. «La finamira da quest di è da musar a la giuventetgna ch'i dat per mattas bleras pussaivladads d'emprender er ina professiun betg tipica per dunnas e viceversa», ha declerà *Silvia Hofmann*, la madra dal post da stab per l'egualità da las schanzas, «e sco che nus constatain n'è far politica betg insatge tipic per las dunnas.» Dal parlament grischun fan part sco ch'ella di mo 19 pertschient dunnas, la media svizra è actualmain 30 pertschient

dunnas en ils parlaments chantunals. «Perquai avain nus studegià gia avant trais onns co ch'ins pudess augmentar la participaziun da las dunnas grischunas a la politica, ed uschia avain nus stgaffi dal 2012 l'emprim parlament da las mattas.» Inspirada per fundar quest parlament l'aveva, sco ch'ella ha ditg, in zic er il «parlament des filles» en il chantun Vad: «Jau l'hai visità avant in pèr onns e gi grond plaschair da vesair co che questas mattas da 12 u 13 onns discussiuneschan senza retegningeschas u temas.»

Cun participantas da tut il Grischun
Dal segund parlament da las mattas han prendi part gievgia 101 mattas en la vegliadetgna da 13 fin 16 onns da tut il Gri-

schun. «Gia duas emnas suenter che nus avevan scrit a las scolas e ch'ils magisters e las magistras avevan infurmà lur scolaras eran entradas las passa tschient annunzias», ha constatà *Silvia Hofmann*. Cun il sustegn da menturas e menturs ch'èn deputads al cussegl grond han las mattas tschernì dus temas e formulà quatter dumondas ch'ellas han fatg a chaschun da l'ura da dumondas al president da la regenza *Martin Jäger*. La presidenta dal parlament da las mattas era la deputada al cussegl grond *Sandra Locher Benguerel*. Ella ha manà la debatta. Il pled d'avertura ha tegnì la matta *Anita Dirnberger* d'Andeer e gimnasiasta ad Aschera. Ella aveva fatg part gia da l'emprim parlament da las mattas.

Chattar dimoras per requirents d'asil minorens

Las mattas han discussiunà sco emprim la dumonda sch'i manchian a blers giuvenils purschidas attractivas per il temp liber. A l'avis da la gruppa cun *Laura Weber* da Cuira duessan las vischnancas grischunas vegnir obligadas da metter a disposiziun bler daplirs locals, piazzas ed edifizis nua ch'ils giuvenils pudessan passentar lur temp liber, «senza stuair consumar». Uschia tgrissan ils giuvenils lur contacts socials pilvair e betg mo via ils mediums socials en l'internet, èsi vegnì argumentà. Cun 90:2 vuschs ed otg abstenziuns da la vusch ha sustegnì il parlament da las mattas questa dumonda per mauns dal Ccussegl grond grischun.

La segunda dumonda da la gruppa cun *Bianca Flütsch* da Glion ha tematisà la situaziun dals requirents d'asil minorens che arivan en Svizra ed en Grischun sulets, senza esser accompagnads da creschids. Per quests requirents existan dimoras aposta, ina p. ex. a Tavau. Da la discussiun èsi resultà che la maiortad dal parlament da las mattas era da l'avis che quests uffants sa sentissan pli bain en il ravugl da famiglias ospitantas. Cun 69:11 vuschs e 20 abstenziuns da la vusch ha approvà il parlament da las mattas era questa dumonda per mauns dal cussegl grond. A la fin da la debatta han surdà las mattas las duas petiziuns a *Vitus Dermont* che presidiescha il parlament grischun.



Il parlament da las mattas cun lur menturs e cun il president da la regenza *Martin Jäger*.

FOTOS F. ANDRY



Laura Weber (entamez) e *Bianca Flütsch* han surdà las petiziuns a *Vitus Dermont*.